

Daxboh, Gou Siengj Mwnghz

爸爸，我想你

贵港市覃塘区蒙公乡双龙小学三年级(2)班 陆美晨



Gwnz gai, sing bauq yiengj-bungbung, sing hemq, sing riu doxcab youq itheij, gig nauhyied, ngoenzneix dwg ngoenzciet bet nyied cibngux.

Gou ndwn youq gwnz gai, yawjraen gyoengq lwnghyez doih cungj gaem fwngz daxboh doq gangj doq riu bae cawx gijgwn, ndawsim gou liengzsis, raemxda dingj mbouj ndaej lae roengzdaej

lo. Vihliux ndaw ranz gwndaenj, vihliux soengq gou doegsaw, daxboh cijndaej liz ranz okbae dajgoeng, moix bi daengz ngoenzneix, gou couh daegbied siengj daxboh.

Mbwn laep roengzdaej, gyoengq lwnghyez doih gaenq angqvauvau dawz bingj dawz mak daeujdaengz ndaw diegrum, caj ronghndwen okdaej.....

Ronghndwen okdaej lo, gig luenz, gig rongh. Gou ngiengx gyaeuj yawj ronghndwen, ronghndwen mboujdanh swheij okdaej, lij daiq gyoengq lwnghyez de—ndaundeij. Gou yawj seiq-henz, gij lwnghyez wnq cungj caeuq daxboh daxmeh youq itheij gangj-gangj riuri. Seizneix, gou geijlai siengj daxboh youq henz ndang

gou ha. Gou miz haujlai vah siengj doiq daxboh gangj, hoeng daxboh dingq mbouj nyi. Daxboh mbouj youq henz ndang gou, de youq giz wnq, gig gyae. Gou rox daxboh hix lumj gou siengj de haenx siengj gou. Daxboh caeuq gou gangj gvaq: "Niq, gou mbouj youq henz ndang mwnghz, mwnghz aeu gaenx hagsib, gou maqmuengh yawjraen aennaj mwnghz ciengz-ciengz cungj dwg riu! Lajmbwn mbouj miz saeh nanz, cijaeu mizsim bae guh couh guh ndaej baenz! Niq, haenqrengz bw!" Gij vah daxboh cungj geiq youq ndawsim gou.

Daxboh, mwnghz aeu haeujsim ndangdaej, gaej guh hong baeg lai. Daxboh, gou siengj mwnghz!

(指导老师:覃庆贻)



Gij "Heiq" Ndaej Hingz

胜利的“气味”

Haemh haenx, gou caeuq gyoengq doengzdoh guhcaemz doxndoj. Yawj ndaw hongh hoengqvangvang, gou miz di nyap lo, ndoj haeuj gizlawz bae ndei ne? Seizhaenx, gou yawjraen aen cekgaeq gok ciengz—gizneix wnggai haemq ancienz ba. Gou ngamq gungj hwet ndonj haeuj cekgaeq bae, gyoengq gaeq couh cici caca hemq lo. Gou ganjvaiq sing iq naeuz: "Ci, gaej hemq lo, dwg gou, cungj mbouj rox bouxcawj iq mwnghz la? Gou couh ndoj youq gizneix yaep ndeu." Mbouj rox dwg mbouj dwg caen dingq rox gij vah gou, roxnaeuz raen gou mbouj sienghaih gyoengqde, gyoengq gaeq ciemhciemh dingh roengzdaej lo. Gvaq yaep ndeu, gou dingqny sing byaij gyoengqdoih lo. Gyoengqde youq ndaw hongh ra liux le, hix mbouj siengj daengz gou ndoj youq ndaw cekgaeq. "Byaij ba, raeuz bae giz wnq ra ba!" Dingq gyoengqdoih byaij gyae le, aensim gou gaenjged haenx cij soeng roengzdaej. Seizhaenx, raq heiqhaeu ndeu ndonj haeuj congghndaeng gou daej, haeu dwk gou ganjgip ndonj ok rongzgaeq daej. Ciq gij rongh ronghndwen baez yawj, gou cij fatyienh gwnz ndang gou nem miz haujlai haexgaeq.

Seizneix siengj hwnj gienh saeh neix, gou lij dwg daej riu mbouj baenz. Bouxwnq ndaej hingz dwg angqvauvau, gou ndaej hingz cix nyouq daengz gij "heiq" haeu.

(seiq nienzgaep Cangh Hauyenz)

Gou Dang "Caizcwngh Gvanjlijenz"

我当“财政管理员”

Ngoenzhaenx gou caeuq daxboh daxmeh bae cauhsi cawx doxgaiq. Daxmeh daeznaeuz youz gou daej dang "caizcwngh gvanjlijenz", couh hawj gou 100 maenz ngaenz, youz gou daej anbaiz cawx doxgaiq. Gou angq lai lo. 100 maenz ngaenz doiq boux lwnghyez daej gangj caen dwg gig lai lo, gou ndaej siengj banhfap mbaet di roengzdaej guh cienzlingzyungh.

Gou daiq daxboh caeuq daxmeh byaij haeuj ndaw cauhsi. Daxboh riu aenlamz, mbouj dingz gip doxgaiq roengz aenlamz bae. Yi, daxboh baenzlawz lumj lwnghyez nei, yawjraen gijmaz cungj siengj aeu! Baihaenx daxmeh yawjyawj gizneix, youh

yawjyawj gizhaenx, lumj siengj gijmaz nei genj doxgaiq, yienz-haeh genj aeu geij yiengh gijgwn de gyaez gwn haenx. Gou ne, gizlawz gamj genj doxgaiq ha, yawj gij doxgaiq ndaw fwngz bohme, 100 maenz youq ndaw fwngz gou couh yaek mbouj raen lo!

Daxboh riu lamz doxgaiq naeuz: "Dauhdauh, daej gyau cienz." Gou miz di veiznanz naeuz: "Daxboh, mwnghz dawz ok di, gaej cawx baenz lai, ndaej lwi?" Daxboh miz di saetmuengh, naeuz: "Gijneix cungj dwg gij doxgaiq gou gyaez haenx ha, mwnghz couh hawj gou cawx ba!" Seizhaenx, gou lumj yawjraen gij yiengh doenghbaez gou gouz daxboh cawx nei.



Dang "caizcwngh gvanjlijenz" caen mbouj yungzheih ha, gawq aeu hablex bae yungh cienz, youh aeu laengz daihgya mbouj miz hanhhaed bae yungh cienz, dwg gienh saeh haemq miz yozvwn he. Yawjdaej gou baezlaeng aeu rox di saeh, lai vih bohme siengj cij ndaej.

(haj nienzgaep Fungz Dauh)

Swhgeij Hag Rox "Bin Faex"

学会自己“上树”

Mwh hwnjdangz, lauxsae cam: "Gwnz faex miz aen mak ndeu, siengj aeu ndaejdaengz aen mak neix, miz geij cungj fuengfap ne?"

Neix wnggai gig genjdanh ba? Hoeng gyoengq doengzhag mwnghz yawjyawj gou, gou yawjyawj mwnghz, byawz hix mbouj rox baenzlawz dap.

"Daih'it cungj fuengfap, couh dwg ndwn youq laj gofaex, caj rumz bongj aenmak doek roengzdaej." Lauxsae riuri le, naeuz: "Hoeng miz mbouj miz rumz bongj, neix youz aenmbwn daej dingh, mbouj dwg youz bouxvunz raeuz daej dingh bw."

"Daihgeih cungj fuengfap, couh

dwg ra diuz faex he, aeu faex gyongz aenmak roengzdaej." Lauxsae ciepdwk naeuz, "Hoeng diuzfaex mbouj dwg seizseiz gizgiz cungj miz, neix hix mbouj dwg youz raeuz gaemguenbw."

Dingq gij vah lauxsae le, gyoengq doengzhag lij dwg bouxboux daengx naj mbouj rox baenzlawz guh.

"Daihsam cungj fuengfap, couh dwg hag rox bin hwnj faex bae, bin hwnj faex bae dawz mak mbaet roengzdaej." Lauxsae naeuz: "Hag rox bin hwnj faex bae, neix couhdwg doenggvaq raeuz bonjfaenh roengz-rengz guh ndaej daengz."

Gyoengq doengzhag lumjbaenz

rox di lo.

Lauxsae doeklaeng naeuz: "Caj rumz bongj aenmak roengzdaej, couh dangq dawz minghyinh swheij gyau hawj aenmbwn anbaiz; aeu diuzfaex gyongz aenmak roengzdaej, hix dwg gauq mbouj ndaej, aenvih raeuz mbouj ndaej baujcingq seizseiz gizgiz cungj ra ndaej diuzfaex. Ndigah, guh gijmaz saeh, cungj gaej cienzbouh maqmuengh roxnaeuz gauq bouxwnq. Cijmiz doenggvaq swheij roengz-rengz, mboujduenh daezsang gij bonhsaeh swheij, swheij caencingq hag rox "bin hwnj faex" bae, cij dwg fuengfap cei ndei aeu ndaej aenmak



roengzdaej haenx."

Gyoengq doengzhag bouxboux cungj ngaekgyaeuj, ciepdwk sing bekfwngz yiengjsasa.

(Yij Siengz)